

金文最

金

文

最

金文最卷五十七目錄

行狀 哀詞 祭文 傳

先君行狀

王寂

姚君哀詞

見文雅

王寂

袁先鋒副統詞

趙秉文

姚醉軒先生哀詞

見文雅

党懷英

起兵以遼罪祭告天地文

太祖

祭高麗恭孝王文

熙宗

祭高麗恭睿太后文

世宗

國子監釋奠充國公祭文

明昌五年

祭陣亡士卒文

至甯元年

見文雅

祭城隍文

王寂

祭姬平叔文

見文雅

趙秉文

祭薛威儀文

趙秉文

祭劉雲卿文

趙秉文

郭彥卿祭蝗文

李俊民

史冲霄祭清源王文

李俊民

設醺祭亡靈文

見文雅

李俊民

設醺祭孤魂文

李俊民

崔仲通祭孤魂文

李俊民

祭飛蝗文

元好問

爲第四女配壻祭家廟文

元好問

中令耶律公祭先妣國夫人文

元好問

偽齊敕祭唐忠武王渾城文

以上原列卷一百十三

趙秉文

祁忠毅公傳

見文雅

穆名缺

白雲庵大論師義公傳

隆州錄事進士

郭黻

師節婦傳

井序

李俊民

孟氏家傳

子孟駕之

王子小傳

王穆好問

宗室文卿小傳

元好問

張信甫小傳

元好問

王元佐小傳

元好問

眞靜崔先生傳

杜仁傑

以上原列卷一百十四

金文最卷五十七目錄

金文最卷五十七

昭文張金吾月霄輯

行狀

先君行狀

王寂

先君諱礎字鎮之姓王氏大名莘人也其先出於周靈王太子晉之後由先君而上六世祖諱晝宋魏國文正公旦之從弟也初文正之父晉公厯顯漢周逮建隆開寶閒卒以直道不容不登大用嘗手植三槐於庭曰吾後世子孫必有爲公者至文正信然故世號其門曰三槐王氏晝爲人勇果善騎射咸平初以靈夏之役累功遷供備庫使景德中命率所領戍雄州以禦契丹是時鳴鏑滿郊每戰輒勝一日輕兵追北夜陰霾迷所向誤墮溺津爲遼人邏得之羈縻於景州南部落子孫因家焉會大父文進輕財樂施世稱長者大父昇尙書比部員外郎父臣忠崇祿寺丞成州錄事參軍卒贈朝列大夫先君年二十七舉進士第釋褐補宏文館校書

郎奉聖州寺判再調忻州秀容縣丞時天會五年王師南伐調發民兵本部以先君主之進攻唐鄧城陷軍中盡俘壯健而殺老弱先君獨取其老弱者數百朝與之會夜卽縱去明年凱旋時州境有劇盜高麻胡恃險與眾鴟張莫制先君伺閒夜銜枚破壘掩殺渠魁遲明俘馘殆盡郡以狀聞就遷太子洗馬知縣事俄以成州居喪去職服除攝洺州雞澤令會遼東更置郡縣守令皆取當時治有聲迹者先君擢海州析木令旣至則不以窮鄉僻陋鄙夷其民而百事裁以繩墨數月告治舊俗多畜蠱毒殺人以祈富先君爲出秘方轉相傳付所活不可勝計歲滿移知眞定府平山縣縣有奚兵主將蕭嘉哩合私釀酒椎牛閒遣奴輩白晝漁奪於市前爲邑者熟視強梗者莫敢治先君盡發其姦賊捕奴之用事者案服抵罪自是脅肩累足訖去不敢犯已而赴行臺吏部當王植王効輩分職銓衡一見先君喜甚曰田吏部知公廉士久欲改官當從此著鞭矣先君辭以疾授定州唐縣令先君退謂所知曰田侯

疾惡太甚怨隙已成其能免乎未幾果起大獄唐爲山中望縣然學校之廢已久先君慨然歎曰養士之源發於鄉黨今吾邑曠數十年訖無一人得雋於場屋是豈風厲之不至耶迺大新廟學延集諸生親爲指授檢責其日課自爾獻賦策名者相繼先是鄰封有狂道士姓慕者妄憑神語陰構異圖旣而事敗先君承府檄大索支黨乃獨捕其始事十數人餘置而不問或有持社案名氏以告者先君曰是事了無干涉亟命火去父老至今懷德肖像以祠其後歷中西南京平陽京兆轉運判官往任西京歲平薊大饑逐會之民疾疫死亡相藉於路先君謀及僚屬爲割廩餘日具饘粥以食餓人旣而豪宗大姓爭出粟相助賴以全活者十七八先君雅倦游方抗章求去適會命下遷歸德府判官時府帥怙權專恣遇官曹暴甚嘗課諸縣伐冰厚取其值以資公帑先君曰二千石爲天子牧民者也奈何掠民膚髓爲觴豆之奉乎力爭乃罷初自長吏而下皆不悅及旁郡有坐是而黜者始謂先君曰微公幾殆

由是信服事多咨決先君曰吾年如此豈能終埋沒於簿領哉翼
日請老以歸先君天資渾厚胸次洞然與人無秋毫隱自其壯歲
聲聞藹然謂青雲立可致無何跋扈反墮冗調中顧尋常出其下
者踵相躡臺省矣人以為必不能平先君處之怡然自得性嗜書
卷未嘗去手有詩百篇平淡簡古如其為人中年以來世味嚼蠟
因自號退翁喜竺乾學從香林比丘悟柔傳出世法歲晚飯蔬衣
褐翛然如僧過故山泉石佳處杖履終日徜徉乎其閒如是者十
有四年一夕奄遘微疾閱數日晨起如平時沐浴易服跣趺而逝
屬纊之後香聞滿室信宿乃歇人皆異之壽八十二實大定丁酉
四月初一日也先君仕四十三年積官至通奉大夫夫人清河張
氏汾州西河主簿孝端之女夫人有賢行為中外姻族表儀累封
太原郡夫人後先君五年卒男三人曰寂中憲大夫中都副留守
兼本路兵馬副都總管曰案修武校尉蚤世曰缺進義副尉前同
監睢州酒孫男七人曰欽哉直哉良哉鄰哉庸哉文哉熙哉女孫

五曰貽余適左國公孫茂曰瑤珍瓊珍弄珍勝珍並幼曾孫一曰
誥孫不肖孤寂等期以某月日奉先大夫先夫人喪葬薊州遵化
縣仁壽鄉靈應山之東原從治命也今謹錄其遺事大概以俟立
言君子圖不朽焉謹狀又先君墓銘曰

維盤之東全燕古風淑氣充塞挺生我公厥初受氏周靈王子三
槐之大自文正始公廉且明所莅有聲滅臚破蠱死者復生不肯
俛首甯居牛後惜哉陸沈誰援以手有官建節不爲之衰身體強
健年及期頤乘除得失天意可知棺衾旣具銘旌啟路斂服以常
治命有素納石於壙孝心永慕夜何晨兮閉佳城春復秋兮風宰
樹鉅金之大老兮王公之墓

拙軒集

哀詞

哀先鋒副統詞

趙秉文

皇天賦予一人兮胡獨鍾此淑靈孕陰山之勁氣兮萃潢水之精
英冒黑山之苗裔兮踵一旅之家聲身大不配其瞻兮又重之以

修能飛叢矢於指端兮匪絃月而彀星超百步而命中兮若馳風
而挈霆突沙陀之重圍兮破下蔡之精兵維所向而無前兮以長
槍而得名從元戎以南征兮貳前鋒以啟行頓厯陽之城下兮斷
懸橋以先登偶流矢之中顙兮氣猶勵而奮征寒日薄於虞淵兮
黯流星之墮營旦釋圍以赴滁兮摧吾萬里之長城嗚呼哀哉將
行流沙麒麟骨折欲濟大江亡失舟楫如何昊天喪我英特如可
贖兮百身何益千人一英萬人一傑生也何艱奪之何卒天賦絕
藝神授秘訣輪扁無傳廣陵遂絕嗚呼哀哉部曲散兮寶刀匣虎
輦摧兮生死決風蕭蕭兮霧冥冥烈士拔淚兮悲泉咽嗚呼哀哉
生何爲兮死何歸生無成兮則如勿生生不識兮死諫之諫國殤
兮酸余情

淫水集

祭文

起兵以遼罪祭告天地文

太祖

世事遼國恪修職貢定烏春窩謀罕之亂破蕭海里之眾有功不

省而侵侮是加罪人阿疎屢請不遣今將問罪於遼天地其鑒佑之

金史

祭高麗恭孝王文

熙宗

惟靈撫有藩封踐修遺訓忠勤著於三世功利被於一方遽爾考終茲焉茹歎式馳使傳往致奠儀庶其有知歆此至意

高麗史

祭高麗恭睿太后文

世宗

惟靈早自慶閥來嬪侯蕃始以婦道相其夫終以母慈保厥子遽違榮養良可哀憐宜加賻贈之儀仍致酒殽之奠貞魂如在寵數其歆

高麗史

國子監釋奠兗國公祭文

明昌五年

維年月日具位致祭於先師亞聖兗國公爰以仲春上丁釋奠於先聖至聖文宣王惟公德冠四科師表百世仰止宣聖其殆庶幾配食廟廷時惟舊典謹以制幣牲齊粢盛庶品式陳明薦配食於

神尚饗

陋巷志

祭城隍文

王寂

維年月日具位某謹以香酒茶果之奠致祭於城隍之神惟神受命於天分職茲土限幽明之雖異課殿最以實同今日祇奉絲綸繕修城郭敢期陰相迄用有成豈惟吏責之可逃要使廟食之無愧尙響

拙軒集

祭薛威儀文

趙秉文

嗚呼世降道喪朴散而漓古風不還慨莫予追有人於此真淳不欺不獨今無古人亦稀猗歟尊師抱一不離嚴奉戒律始終不虧心地開朗而拙言詞終日如愚退發其私老莊儒釋一以貫之昔我先君與師之師情同義合命駕相期晤語終日忘渴忘飢我父子子爾爾資爰敦夙好世德是儀自始識面暨老且衰三十餘年不磷不淄我從北來見師湓湄環堵蕭然黃冠白髭貞祐初元天發殺機桑梓陷沒親識誅夷獨師尙存喜見睫眉挈置河南館之宮祠謂守丹竈莫如子宜命也如何一病莫支超然坐逝棄我

如遺師旣云歿殭坐移時頭頂尙暖超昇不宜盛以瓦棺葬之路
垂死生夢幻臭腐神奇不亡者存夫復何悲尙響復銘其墓曰
千虛不如一實萬言不如一嘿養內者德養外者賊至於體軟而
天頂暖而濡以形形心維德之符

淦水集

祭劉雲卿文

趙秉文

嗚呼雲卿而至斯耶壽不登五十官不過七品而止於斯耶方行
萬里出門而車軸折何辜於天而奪之遽耶旣畀之才而不畀之
壽何侈於彼而獨靳於此耶嗚呼哀哉如君之才無適不宜小試
所長英英不羈暫爲御史自信不疑奮身直前百謫不辭旣厄居
陳心和且夷講道論義飲酒賦詩諸公交辟請置劇司屈宰一邑
牛刀割雞政聲籍甚草木皆知召還北苑棄我遺黎父老遮道毋
以公歸我公去矣我民之思桐鄉遺愛葉邑立祠旣斥而復謂將
有爲文章政術百未一施曾不踰月而死及之嗚呼哀哉君之始
病一僕自隨君之妻子適來京師及其蓋棺猶及臨之嗟嗟老母

倚門望之哀哀孤魂夢寐見之扶櫬還家何以告之聞此訃音何以處之嗚呼哀哉維南山翁文爲世師令德之後桂林六枝君雖往矣有此二兒復大其家尙或似之君爲不死聊以慰之嗚呼哀哉尙響

滄水集

郭彥卿祭蝗文

李俊民

三日爲霖已沐漑枯之渥八月其穫尙虞飛孽之裁方致虔祈遽蒙嘉蔭蓋以至誠而神感遂使大田之稼多無害有秋敢忘昭報肅陳菲薦仰答靈休

莊靖集

史冲霄祭清源王文

李俊民

導流旣東書備明乎禹績祭壇而北禮詳著於周官昔者封侯今而王爵善利於物克長厥靈驅雷叱電以張天之威騰雲致雨以澤地之產不愛其寶故時時而效珍所享者誠宜翼翼而懷福肅陳菲薦仰瀆明靈冀有感通曲垂眷佑

莊靖集

設醮祭孤魂文

李俊民

嗟嗟汝魂生何不辰罹此多難道喪生輕時危命賦壽夭所係將
軍一戰同爲枯骨游魂之變可哀可矜可弔可唁蚯蚓鑽額烏鳶
啄面月苦霜白風悲露泣傷心哉時耶命耶何不幸也蜂蠆之毒
耶鯨鯢之戮耶彼氣之竭旗之靡耶彼血之流戈之倒耶泰山之
哭虎之猛耶桓山之悲鳥之別耶愛人之官鬼之朴耶爲人之役
鬼之俛耶枕者之尸誰其封耶爨者之骸誰其掩耶嗚呼天地之
閒人爲過客能壽幾何各反眞宅何者爲休何者爲戚雖皆人禍
亦乃天厄所棲者魄有兆有域所享者德有黍有稷魂兮不昧宜
其來格

莊靖集

崔仲通祭孤魂文

李俊民

佳城馬過益增鬱鬱之嗟華表鶴來徒切纍纍之恨諒惟冥漠不
昧英靈肆陳黃籙之筵爲指朱陵之路

莊靖集

祭飛蝗文

元好問

粵惟此州百道從出調度之急膏血旣枯懸望此秋以紓日夕沴